

**Reaksi: MP Kuala Selangor Bantah Pemberian Elaun Tambahan
mStar Online**

Oktober 07, 2011

Oleh SUSAN ALBERT KASSIM

KUALA LUMPUR: Ahli Parlimen Kuala Selangor, Dr Dzukifli Ahmad (PAS) membantah sekeras-kerasnya pemberian elaun tambahan kepada Ahli Parlimen yang diumumkan Perdana Menteri dalam Bajet 2012 pada Jumaat.

Sebaliknya, beliau berkata, pemimpin Pakatan Rakyat memerlukan pegawai penyelidik di Parlimen bagi memperbaiki keupayaan mereka dalam menyampaikan perbahasan yang berkualiti.

"Kami tidak menerima kenaikan elaun itu kerana tidak mahu dituduh bersekongkol dengan kerajaan," katanya ketika ditemui pemberita di sini, Jumaat.

Mengulas mengenai kenaikan gaji kakitangan kerajaan, Dr Dzukifli berkata, tindakan itu jelas tidak adil kepada pekerja sektor swasta yang memerlukan gaji minima.

"Pekerja swasta akan tertekan kerana isu gaji minima masih belum diselesaikan sehingga hari ini. Setiap kali, kakitangan awam dinaikkan gaji dan diberi bonus, inflasi akan berlaku yang akhirnya memberi beban kepada semua pihak," tambahnya.

Sementara itu, mengulas mengenai cadangan kerajaan menaikkan had maksimum harga rumah Skim Rumah Pertamaku daripada RM220,000 kepada RM400,000 beliau berkata, ia dikhuatiri akan meningkatkan risiko bebanan hutang kepada golongan berpendapatan kurang RM3,000.

"Apa yang penting sekarang adalah meningkatkan pendapatan rakyat dan bukannya membebankan mereka dengan hutang yang semakin meningkat," katanya

Hakcipta Terpelihara © 1995-2011 Star Publications (Malaysia) Bhd

Source:

http://mstar.com.my/berita/cerita.asp?file=/2011/10/7/mstar_berita/20111007204803&sec=mstar_berita